



Tokabaot Fores mo Natural Risos Long Vanuatu

Learning Circle Module

Oli Developem tru lo “Capacity Strengthening of Chiefs, Landowners and Community Leaders to Safeguard Rainforest Resources in Vanuatu” Projek





Government
of Canada



LIVE&LEARN
Environmental Education

Prepared for Global green grants, IWDA and Canada Fund by Live & Learn Environmental Education, Vanuatu

November 2008

Country Manager: Kali Vatoko

Fres Wota Four (opposite Fres Wota School), PO Box 1629, Port Vila - Vanuatu

P: +678 27448, F: +678 27455, E: vanuatu@livelearn.org, Website: www.livelearn.org

Written by Amos Kalo and Gina Tari

Design and layout by: Karen Young

Illustrations by: Nik Pike

Photos provided by: Live & Learn Environmental Education

© Copyright: Live & Learn Environmental Education

Learning Circle Aotlaen



Introdaksen	4
<i>Infomesen abaot Live & Learn</i>	4
<i>Gaed Blong Facilitator</i>	4
<i>Hao Blong Usum Buk ia</i>	4
<i>Aknolejmen</i>	4
Session 1: Value Blong Natural Risos	5
Session 2: Faenemaot Olgeta Jenis we i Stap Tekem Ples	7
Session 3: Explorem Risals Blong Ol Jenis	8
Session 4: Wanem Yumi Save Abaot Fores mo Logging	9
Session 5: Ekonomik Impakt Blong Logging	15
Session 6: Komuniti Desisen-Making	18
Session 7: Ol Raets Blong Fiuja Jeneresen	20
Session 8: Status Blong Fores Long Vanuatu Tedei	22
Session 9: From Wanem Yumi Raorao From Natural Risos?	23
Session 10: Natural Risos mo Conflict	24
Session 11: Kastom Tabu Mo Bi-Law	25
Session 12: Hu i Responsible Blong Lukaotemgud Fores?	26
Session 13: Diffren Roles – Wan Komuniti Nursery	27
Session 14: Ecotourism mo Konsevesen Long Komuniti	28
Session 15: Wanem Bae Yumi Mekem Naoia?	29

Introdaksen

“Tokabaot Fores Long Vanuatu” emi part blong Fores toolkit we Live & Learn Environmental Education (Vanuatu) i developem. Toolkit ia emi includem Fores DVD, Fores Posta, Fores Brochure mo Fores Manual.

Toolkit ia emi aim blong *developem capacity blong ol komuniti lidas long fasin blong mekem decisen we i luksave raets blong ol pipol tedei mo blong ol fiuja generesen.*

Ol materials ia i blong educatem mo helpem komuniti lidas, komuniti membasa, tija mo students blong luksave valiu blong natural risoses mo investigatem ol narafala fasin blong karem mani ikam insaed long komuniti tru long bush blong yumi.

Eni komuniti trena o wan tija i save usum buk ia.

Infomesen abaot Live & Learn

Live & Learn Environmental Education emi wan not-for-profit mo non-gavman organisation we i aim blong wok tugeta wetem ol komuniti blong inkrisim save long ol sastenabla fasin (jens) we i benefitem ol komuniti mo daonem poveti.

Yu save contactem mifala long address ia blong karem moa infomesen:

Live & Learn Environmental Education, Freshwota Skul,
P.O. Box 1629, Port Vila, Tel: 27448, Fax 27455,
Email: livelearn@vanuatu.com.vu or visitim
www.livelearn.org

Hao Blong Usum Buk ia?

Yu mas folem gud ol steps blong wanwan aktiviti insaed long buk ia blong participant i ajivim objective. Facilitator i save usum ol material mo equipment we i stap long buk ia o i save usum difren materials blong karemaot wan aktiviti.

Aknolejmen

Live & Learn Environmental Education (Vanuatu) i wantem talem tankiu long olgeta ia we oli bin contribute long developmen blong risos ia, igat:

Ol staff blong Live & Learn (Vanuatu)

<i>Jenny White</i>	Landholders Conservation Initiative
<i>Rexon Vira</i>	Forestry Department
<i>Jo Dorras & Leinasei Simon</i>	Wan Smolbag Theatre



Session 1:

Valiu Blong Natural Risos

Long En Blong Session patisipen i save:

- Andastanem toktok ia 'natural risos'.
- Talemaot ol natural risos we i stap long komuniti.

Taem

2 haoa

Ol Samting We Yu Nidim

Braon pepa, marker pen, notebook/A4 pepa, clipboard mo pencil, cads



Learning Circle Instraksens

1. Askem patisipens blong faenem wan patna/fren blong save wok wetem hem. Not blong *Facititata* : *yu save askem olgeta blong ko long smol grup sapos patisipen i plante. Wok long pair i save tekem fulap time bitim wanem we yu save tingabaot.*

2. Givim ol cads igo long wanwan grup mo askem olgeta blong tokabaot wanem i stap long ol cads ia. Talemaot long olketa se bae ino kat presentation long wanem we oli tokabaot. Photo 1 – forest, Photo 2 – riva, Photo 3 – fish, Photo 4 – bamboo, Photo 5 – buluk Photo 6 – graon

Not blong Facilitator: emia i save kam wan introdaksen mo backgraon infomesen blong ol patisipens.

3. Diskasem olgeta kwestens ia wetem patna/fren blong yu mo serem ansa igo long evriwan. Raetem daon ol ansa long braon pepa mo kipim olsem wan rikod.

- Toktok ia 'natural risos' i minim wanem?
- Wanem natural risos we yu nidim blong liv long vilij?
- Hao nao ol evridei-activitis blong yumi oli dipen bigwan long natural risos?
- Wanem bae i happen long vilej sapos i nomo gat ol natural risos ia?

Not blong Facilitator: Talemaot long ol patisipen se nekis aktiviti bae oli wokabaot long vilej mo lukluk long ol natural risos. Nem blong aktiviti ia emi transeck walk. Emia i minim se bae yumi wokabaot tru long vilej mo faenemaot ol natural risos mo droem wan map we i soem ples we yu save faenem risos ia long hem.

4. Transect Walk aktiviti – ridimaot ol steps ia long ol patisipen. Facilitator i save tokabaot rol mo fasin blong tekem not. Mekem sua blong givimaot ol materials long olgeta mo askem olgeta blong go wokabaot.



Ol Steps:

Bifo ol patisipen i go wokabaot, divaedem ol patisipens long ol smol grup blong faev.

Mekem sua se wanwan grup ikat wan notbuk o wan pis pepa we oli save raetem ol not long hem. Explenem role/wok blong tekem note, we emi inkludem kipim rikod long ol diskasen mo mekem not we i save helpem grup blong droem transect map. Ol tim memba oli mas lukluk gud long taem blong wokabaot. Yu save ko aot long stret rod sapos i gat wan samting we grup i intres long hem.

Askem wanwan grup blong tokabaot ol difren samting we bae oli droem long map, mo agri long rod blong wokabaot long hem mo save luk ol samting we i stap long lis.



Wanwan grup bae i go wokabaot long rod we oli agri long hem. Taem yu wokabaot, yu mas lukaotem ol samting we grup bae i raetem long braon pepa.

Taem yu go bak, man/woman we i tekem not bai i droem transect map we i shoem olketa natural risos we grup i faenemaot.

Taem evri grup i finis droem map ia, bambae oli presentem long evriwan. Diskasem wanem nao oli faenemaot long team we oli wokabaot long komuniti.

5. Foloap diskasen kwesten:

- Wanem nao aktiviti ia emi stap talem long yumi?
- Raetem wan lis blong ol natural risos we yumi stap usum long vilej?
- Wanem nao yumi save abaot natural risos we i stap raon long yumi?
- Hamas nao yumi dipen long ol natural risos ia?
- Wanem bae i happen sapos yumi distroem, spolem o karemaot ol natural risos ia?



6. Naoia raetem daon ol aksen we yumi save tekem long ol samting we yumi lanem. Diskasem long smol grup ol aksen blong tekem mo raetem ol ansa long bigfala braon pepa mo presentem i go long evriwan. Diskasem ol kwesten ia:

- Hao nao yumi serem ol tingting mo save blong yumi long ol natural risos wetem ol narafala long komuniti?
- Sapos aktiviti ia emi tokabaot mo faenem samfala problem, plis raetem wan lis blong ol problem ia.
- Hao nao yumi save enkarejem gudfala fasen blong usum ol natural risos?
- Raetem wan plan blong AKSEN: wanem nao yumi mekem afta long emia?

Session 2:

Faenemaot Olgeta Jenis we i Stap Tekem Ples

Long En Blong Session ia patisipen i save:

- Aedentifaem ol historical jens we i tekem ples bifo ikam kasem tede long komuniti.

Taem

60 minutes


Ol Samting We Yu Nidim

Braon pepa, marker pens, copi blong tufala tebol: **'Ol Samting We Oli Stap Jenis'** mo **'Ol Samting We Oli Stap Semak Nomo'**.

Not Blong Facilitator Note:

Provaedem wan eksampol long ol jenis we i stap hapen long kavman, populasen mo ol narafala samting. Mekem sua blong tokabaot ol jenis we i happen evritaem (populasen gro) mo olgeta we i happen samfala taem nomo (eleksen blong ol MP's, hariken) emi blong helpem olgeta blong tingting mo save mekem aktiviti ia.

Yu save usum ol foto o pikja tu blong tokbaot ol jenis ia.



Learning Circle Instraksens

1. Talemaot long ol patisipen se blong andastanem aktiviti ia bae yumi mekem aktiviti we oli kolem Taemline. Talemaot long ol patisipen se bae yumi go long ol detail blong ol key events mo jenis we i happen long komuniti.
2. Explenem aktiviti ia long ol patisipen mo askem olgeta blong go long ol smol grup. Givimaot ol marker pens mo braon pepa long olgeta. Nao askem olgeta blong raetem wan stret laen long medel blong pepa ia.
3. Serem ol tingting long grup mo raetem ansa blong yu long braon pepa folem kwesten ia daon:
 - Wanem olgeta bigfala jenis we ibin happen long komuniti?
 - a. Long smol grup, tingting bak long ol taem mo deit we ol jenis i hapen long komuniti blong yu. Nao long wan braon pepa, raetem daon olgeta taem ia.
 - b. Taemline ia i save soem:
 - Olgeta jenis long fasin blong usum graon, karen, plantesen,
 - Populesen i gro;
 - Fasin blong fidim ol pikinini,
 - Jenis long kaikai, wota, meresen mo timba blong haos we i avelebol blong usum;
 - Isius blong natural risos: polutem wota, olgeta nogud fasen blong logging,
 - Isius blong helt, mo ol siknes
 - Introdaksen blong ol niu teknologi, olsem ol wota paep, elektrisiti, toilets,
 - Ol rod, skuls;
 - Ol impakt blong ol projekts we i bin hapen long bifo,
 - Jenis long administresen mo organaesesen, mo
 - Ol jenis long ol bigfala politikal patis.

- c. Explenem long wanwan grup fasin blong mekem presentesen folem diskasen blong evriwan.
- Hao nao jenis i happen – evritaem o samfala taem nomo?
 - Wanem nao i mekem se wanwan komuniti i mas mekem ol difren jenis ia?
 - Wanem emi difren bitwin natural jenis mo jenis we yumi man yumi mekem?
 - Wanem kaen jenis nao yu ting se oli impoten long laef blong yu wan?
4. Givimaot tebol “*Oi Samting We Oli Stap Jenis*” long wanwan patisipen. Talemaot long wanwan grup blong diskasem olketa jenis ia mo fulumap tebol ia. Raetem daon olgeta jeins (change) we yu ting se oli stap hapen long komuniti blong yu naoia. Usum tebol ia ‘*Oi Samting We Oli Stap Jenis*’.
5. Wok long smol grup, diskasem mo agri, sapos i posibol se ol difren jenis ia oli ‘gudfala’ o ‘nogud’ we i save afektem ol pipol mo envaeronmen blong yumi. Makem ol ‘gudfala’ jens wetem wan tick (✓) mo ol ‘nogud’ jenis wetem wan cross (✕), mo ol jenis we yu no sua long hem makem wetem wan kwesten mak (?).
6. Facilitator i save tokabaot lelbet wanem hemi difrens bitwin ol samting we oli stap jenis mo ol samting we oli stap semak nomo. Diskasem ol jenis long tebol ia ‘*Oi Samting We Oli Stap Semak Nomo*’. Makem ol ‘gudfala’ jenis wetem wan tick (✓) mo ol ‘nogud’ jenis wetem wan cross (✕), mo ol jenis we yu no sua long hem makem wetem wan kwesten mak (?).
7. Ripotem i go long evriwan olgeta jenis we grup blong yu i faenemot.
8. Askem olketa kwesten ia long evriwan o raetem ol kwesten ia i go long wan braon pepa mo putum i go long ples we evriwan i save luk. Ol kwesten ia i blong generatem diskasen bitwin ol patisipen. Wanwan grup i save diskasem ol kwesten long grup, be facilitator i mas kliarem se emi no wan debate.
- Wanem nao ol gudfala jenis we i happen mo yumi ting se oli helpem yumi?
 - Wanem nao olgeta samting we bae oli stap semak nomo, mo bae oli kontinu blong benefitem yumi?
 - Wanem tingting blong yu long olgeta jenis we i spolem natural risos?
- Wanem tingting blong yu long ol nogud samting we i stap semak nomo mo i stap kontinu blong spolem ol natural risos?
 - Long wanem wei nao historical save long ol jenis ia i save helpem yumi blong impruvum ol situesen we i stap long komuniti tede?
 - Hao nao infomesen ia i save helpem yumi blong mekem ol gudfala decisen?
9. Serem ol tingting long grup folem ol kwestens ia:
- Hao nao bae yumi kriaetem olketa jenis we komuniti i benefit long hem?
 - Wanem nao yumi save mekem blong stopem ol jenis we i save putum ol risos long denja?





Infomesen pepa blong Session 2: Aedentifaem mo Faenemaot Olketa Jenis

Oi Samting We Oli Stap Jenis'	Jenis ia emi kam wetem gudfala samting?

Oi Samting We Oli Stap Semak Nomo'	Emia hemi wan gudfala samting?

Session 3:

Explorem Risals Blong Ol Jenis

Long En Blong Session patisipen i save:

- Andastanem toktok ia 'natural risos'.
- Talemaot ol natural risos we i stap long komuniti.

Taem

45 minutes

Ol Samting We Yu Nidim

Braon pepa mo marker pens

Learning Circle Instraksens

Backgraon Infomesen

Askem wanwan patisipen blong sidaon kwaet mo tingabaot samfala eksampol mo experiens long laef blong hem. Wanem nao risals blong hem? Wanem tingting blong yu long ol risals ia?

1. Diskasem long smol grup mo ripotem i go bak long evriwan. Raetem ol ansa blong yu long wan pis braon pepa.

2. **Consequence Wheel.** Ridim smol stori ia (daon) mo folem ol steps ia daon blong mekem aktiviti ia.

I bin gat apruval blong katem daon ol fores we i stap kolosap long riva blong smol vilej blong yu.

Logging kampani i putum ol waste blong hem i go long riva. Ren i wasem ol top-soil igo daon long riva mo igo daon long solwota. Waste blong logging aktiviti ia iko kasem ol narafala vilej mo ol riva klosap.

- a. Divaedem ol patisipen i go long 2 bigfala groups blong aedentifaem wan isiu long stori ia antap mo raetem isiu ia long senta/medel blong pepa. Droem plante circle raon long isiu ia.
- b. Nao askem long ol patisipen olketa kwesten ia 'Wanem nao olgeta stret risals?' Diskasem kwesten ia long grup blong yu - Wanem olketa risal we yu save tingbaot mo raetem insaed long fesfala raon/ circle. Emia emi shoem ol fesfala risals/efek blong isiu ia.

- c. Diskasem ol consequences/risals we i folem fes wan. Raetem i go insaed long nambatu raon/circle.
- d. Diskasem mo raetem nambatri mo namba fo risals insaed long ol raon o circle ia.
- e. Long end blong hem yu gat wan wheel we i shoem ol possible consequences/risals we i save kamaot long wan isiu.
- f. Diskasem mo presentem Consequence Wheel iko long ol narafala grup.
- g. Diskasem wetem grup blong yu kwesten ia:

Hao nao Consequence Wheel ia i helpem yu blong tingbaot ol efek blong wan decisen mo wan aksen we yumi wantem tekem?



Session 4:

Wanem Yumi Save Abaot Fores mo Logging

Long En Blong Session ia patisipen i save:

- Sherem ol personal logging experiens blong hem.
- Lanem ol tingting mo experiens blong ol narafala pipol.
- Lukluk long sam komuniti experiens mo wanem tingting blong olgeta long logging.

Taem

Emi dipen long diskasen

Ol Samting We Yu Nidim

Braon pepa mo marker pens


Learning Circle Instraksens

Talemaot long ol patisipen se hemia hemi wan topic we ol patisipen i save gat ol difren filing mo lukluk long hem. Emi gud blong mas lukluk long graon rules blong Learning Circle. Yu save faenem long Infomesen Sheet blong Session 4. Askem evriwan blong ridim tugeta statement ia. Facilitator i save putum statement ia antap lo wall blong evriwan i save ridim.

Bifo logging emi wan isiu long Vanuatu mo hemi gat fulap impakts long ol pipol, envaeronmen mo gavman. I gat plante lukluk long logging. Yumi bilif se blong mekem gudfala decisen, yumi nid blong tokabaot mo andastanem olketa impakts blong logging long Vanuatu.

Part 1 - Bae yumi diskasem ol logging experiens blong yumi wanwan mo serem ol experiens ia wetem evriwan. Afta bae yumi ansarem ol kwestens ia daon.

1. Naoia faenemaot tingting blong komuniti abaot logging. Blong faenemaot ol tingting ol experiens, values mo aedia (ideas), bae yumi mekem wan intaviu wetem ol memba blong komuniti. Gudfala fasen blong mekem wan intaviu i stap long infomesen Sheet blong Session 4. Plis ridim tugeta olsem wan grup. Usum ol gaed ia blong priperem mo mekem intaviu blong yu.
2. Raetem daon samfala kwesten abaot logging we bae yu laekem blong askem ol memba blong komuniti. Yu save askem ol kwesten we i stap long buk ia.



Ol Intaviu Kwestens:

1. Wanem logging experiens blong yu?
2. Wanem nao olgeta stori blong logging we yu bin harem?
3. Yu save long eniwan we oli bin katem wud long graon blong hem? Wanem nao i hapen?
4. Wanem nao yu ting se i gud abaot logging?
5. Wanem olgeta problems we i happen olsem risal blong logging long envaeronmen mo long pipol?
6. Wanem i hapen long wota, kakai, meresin, graon, riva mo timba afta long logging?
7. Wanem nao ol isius we i kamaot long famili/ komuniti afta we logging i finis?

3. Faenemaot ol pipol we yu wantem intavium olgeta olsem ol Jif, ol komuniti lidas, ol lanona, ol woman mo ol youth.
4. Faenemaot sapos yu wantem mekem intaviu wetem wanwan man/woman o yu save intavium tu pipol wantaem, o yu save intavium fulap memba blong komuniti wantaem nomo.
5. Mekem ol intaviu blong yu. Go aot long komuniti mo statem intaviu blong yu.
6. Prisentem risa blong intaviu blong yu i go long ol narafala grup. Wanem nao ol pipol oli talem long yu? Wanem nao ol experiens blong olgeta? Facilitator/wan patisipen i raetem daon ol key samting we yu faenem long wan pis braon pepa mo kipim olsem wan rikod.
7. Afta long presentesen, diskasem olketa kwestens ia:
 - Hao nao ol pipol i filim abaot logging? Wanem nao oli talem?
 - Ol pipol i talem sem samting nomo o i gat ol difren ansa?
 - Wanem nao olgeta mein problems blong logging?
 - Hao nao yumi andastanem tingting blong komuniti long isiu ia we i save helpem yumi blong mekem gudfala decisen blong logging?
 - Yu ting se yumi save usum ol infomesen ia mo mekem awenness wetem komuniti? Sapos yes plis explenem.
 - Hao nao yumi save usum ol infomesen ia mo impruvum situesen blong komuniti?

8. Ridim ol infomesen blong Melanesian Consevasen Tras long Infomesen Sheet blong Session 4. Emi wan infomesen we Tras i putum tugeta blong helpem yumi andastanem gud ol impakts blong logging long envaeronmen mo long komuniti.

Ridim ol infomesen ia mo ansarem ol kwesten ia long grup.

- Wanem nao ol gudfala samting we yu save faenem long fores?
- Wanem nao olgeta samting we wan tri/wud i mekem long fores?
- Wanem i hapen long fores taem wan logging kampani igo insaed
- Wanem i hapen long graon long taem blong logging?
- Hao nao logging i afektem ol riva, sanbij mo rif?
- Yu save se ol woman bae oli wokabaot longfala rod blong faenem gudfala graon blong mekem karen mo karem klin wota?

- Wanem bae i save happen long sik ia malaria taem logging i stat?
- Emi tru se oli promisem sam samting? Wanem nao olgeta promises we kampani i givim long lanona mo long komuniti? Oli fulfilim ol promises blong olgeta?
- Yu bilf se logging kampani i givim gudfala kompensesen from graon blong yu?
- Emi tru se bae ol pikinini ino mo gat gudfala ples blong liv mo mekem karen?
- Wanem i save happen taem ol pipol i lusum koneksen wetem graon?
- Yu bilif se ol pipol i stat liv wetem mani taem kampani i stat wok?
- Hao nao ol pipol i jenis taem kampani ikam? Diskasem ol experiens blong yu.





Infomesen pepa blong Session 4: Wanem Nao Yumi Save Abaot Fores Logging?

Ol Graon Rul blong Learning Circle Diskasen

1. Arenjem ol jea (o sidaon long mat) long wan circle we evriwan i save lukluk wanwan long olgeta. Yu save toktok nomo taem yu holem pillow wetem yu (o narafala samting we i sopsop blong pasem raon o sakem iko raon olsem wan pilow, bol we oli mekem long niuspepa) sapos no yu mas stap kwaet mo lisen long wanem we ol narawan oli stap talem.

2. Taem wan individual i finis toktok, emi save pasem pillow ia i go long wan we i leftemap han blong hem mo askem blong toktok o i go long eniwan.

Yu save putum pillow long medel blong evriwan we oli sidaon long mat, from emia nao ples we eniwan long grup i save pikimap. Sapos eniwan i risivim pillow mo emi no wantem toktok, emi save pasem i go long narawan.

Afta evriwan i toktok, yu nao fri blong koment mo askem kwesten long wanem difren pipol i bin talem.

Fasen Blong Mekem Wan Intaviu

Preperesen

- Mekem sua se purpose blong intaviu emi klia.
- Mekem wan lis blong ol kwesten (4 o 5 emi inaf) blong guidem intaviu.

Introdaksen

Oltaem, introdusem yu wan bifo intaviu i stat.

Kliarem from wanem yu wantem mekem intaviu ia.

Askem sapos emi fri blong save toktok wetem hem.

Diskasem ol topic wetem hem mo explenem se ol storian blong yutufala bae yu no save serem wetem narafala man.

Kondaktem Intaviu

Statem intaviu wetem sam frenly mo general storian, emia bae i helpem hem blong no filim fraet mo i save toktok.

Askem ol kwesten we i isi blong ansarem. Be yu no mas stat wetem wan kwesten we i abaot laef blong yu; emia i save kosem ofens mo stopem fri flo blong infomesen. Oltaem expresem wan tingting long wan kwesten blong avoedem konfusen.

No traem blong askem kwesten we oli ansarem wetem YES mo NO emia emi save stopem infomesen i flo.

Yu no askem “from wanem” from i save mekem olketa ino hapi blong ansarem. Tingabaot blong askem ol kwesten we i save influensem ansa blong hem. Eksampol, neva askem ‘Yu no ting se...? Emia emi wan liding kwesten. No usum ol negatif kwesten olsem ‘Yu ting se ol pipol ino mas...?’ emia i save konfusem hem. Mekem sua se yu andastanem gud ansa. Sapos yu no andastanem gud, askem hem blong riptim ansa blong hem. Oltaem askem hem blong explenem ol toktok mo

tingting blong hem sipos yu no andastanem gud. Yu no tekem se yu save ansa blong kwesten ia. Yu no mas dipen long save mo experiens blong yu.

Yu no mas mekem jajmen, no givim tingting blong yu.

Talemaot long hem taem yu wantem jenisim topic blong kivim janis long hem sapos hemi gat samting blong tokabaot mo priperem hem long niufala topic. No diskasem ol topic we ol man oli nogat inters long hem. Traem blong askem kwesten we i gat koneksen wetem topic. Wajem body lanwis blong yu, emi save soem wan filing o i save disturbem intaviu.

Klosem Intaviu

Kipim intaviu i shot. Ino gat plante intaviu i save last moa long wan haoa mo plante i las 45 minits nomo. Luklukbak long ol poens we yu andastanem mo askem hem sapos samari blong yu emi stret mo riflektem wanem we emi talem. Askem hem sapos i gat wan kwesten we i wantem askem long yu. Talem tankio long hem from taem blong hem.

Guideline Blong Rikodem Wan Intaviu

Usum wan not buk. Rikodem ol detail blong wanem we yutufala i tokabaot. Rikodem body lanwis mo feelings we hemi expresem. Rikodem ol observations mo fasen we intaviu igo. Rikodem hu i talem wanem mo sapos ol narawan i agri. Mekem foloap notes afta intaviu wetem wan obseva. Rikodem ol bilif blong yu.



Infomesen pepa blong Session 4: Wanem Nao Yumi Save Abaot Fores Logging?

Melanesian Conservasen Tras

Infomesen ia i kamaot long wan buk we Melanesian Conservasen Tras i raetem. Emi talemaot hao nao kampani ia i andastanem olgeta impakts blong logging long envaeronmen mo long komuniti.

‘Fores blong yumi emi wan pat blong kriesen blong God. Gift ia ol olfala oli mas pasem igo long ol pikinini blong olketa mo ikam ksem yumi tedei. Plante gudfala samting yumi save faenem long fores, olsem kakai, fresh wota, meresin, gudfala graon blong mekem garen, ol materials blong mekem haos, kenu mo baskets. Ol tri oli protektem graon. Ol tri mo ol narafala plants long fores oli preventem ren blong ino wasemaot gudfala soil/graon. Shade blong ol tri ia oli helpem blong preventem graon blong go hot mo dry’.

‘Yumi save usum fores mo yumi save distroem. Fores i tekem longtaem blong gro. Taem logging kampani i kam insaed mo katem daon ol tri, fores ia bae ino save gro bak long sem wei. Long Vanuatu mo long melanesia, plante fores eria oli kam naoia ol grasslands. Taem yumi distroem fores, ol animols mo pidjin i ded o flae igo long difren ples mo graon i nomo gud blong karen’.

‘Logging emi spolem riva, sanbij solwota mo rif. Taem oli katem daon ol tri, i nomo gat samting blong holem taet graon. Ren bae i wasemaot graon, spolem ol riva, sanbij, solwota mo rif’.

‘Taem fores i destroy finis mo ol riva mo solwota i toti, bae ol woman nao i fesem had taemfrom bae oli mas wokabaot longfala distens blong faenem klin wota mo gudfala graon blong garen. Taem fulap pipol i sik from malaria bae ol woman nao oli lukaotem olgeta’.

‘Fulap logging kampani long Melanesia ino honed long ol lanona. Plante logging kampani oli promisem ol lanona se bae oli bildim ol skuls mo hospitals, rod, givim gudfala wok, mo developmen. Be fulap gudfala wok ia igo long ol waetman. Mo fulap long ol kampani ia oli no bildem rod, ino mekem skuls, hospitals olsem we oli promise blong mekem. Ol rod mo ol bridge we oli bildem i blong mekem wok blong kampani i isi blong karemaot ol logs. Ol rod mo bridge oli no bildem gud mo no save mentenem mo ino longtaem bae oli no gud. Ol kampani oli neva replantem ol tri mo neva riplesem olketa we oli katem daon. Mo taem oli replant, oli planem ol nogud wan’.

‘Ol kampani oli talem long ol lanona se bae oli givim gudfala compensesen from graon blong olketa. Be value blong graon blong yumi emi bigwan moa long

wanem mani i save kivim long yumi. Sapos yumi salem graon blong yumi bae yumi no gat gudfala ples blong mekem garen. Ol pikinini bae oli no gat ples blong liv mo mekem garen long hem. Taem oli nogat ples blong go oli stap mekem wok blong rascals’ o slaves’ long foreign plantasen o long foreign kampani’.

‘Taem kampani i stat wok, plante nogud samting i save happen long ol pipol. Pipol i stat blong laekem mani mo liv wetem mani i mekem se oli livim ol kastom mo tradisenal fasen mo laef bihaen. Pipol i stop wok long karen mo stat blong pem kakai blong stoa. Bodi mo maen blong olketa i stat blong kam slak. Plante pipol bae ino kat garen mo no gat wok – ol pipol ia bae oli stat blong drink alcohol mo bae oli neva save hapi’.

Session 5:

Economic Impakt Blong Logging

Long En Blong Session ia patisipen i save:

- Diskasem impoten role blong mani we i konekt wetem logging.
- Explorem ol shot tem mo long-tem ekonomik costs blong logging.
- Faenemaot ol narafala wei blong mekem mani.

Taem

60 minutes

Ol Samting We Yu Nidim

Braon pepa mo pens.

Learning Circle Instraksens

Yumi mas stretem olgeta raorao o conflicts blong yumi blong protektem fores we yumi mo fiuja jeneresen i dipen long hem, be yumi nidim blong mekem sam mani blong mitim ol kwik nids blong yumi. Wanem nao sam rod we yumi save lukluk lo hem?

1. Serem tingting blong yu wetem grup folem tufala kwesten ia. Raetem daon ansa blong yu long braon pepa.
 - Wanem olgeta samting we yu nidim mani from?
 - Hao nao yu winim mani blong pem ol samting ia?
2. Wanem impakt blong logging long ekonomi blong kavman? Ridim niuspepa article “Fores emi laef blong yumi” long Infomesen Sheet blong Session 5 mo ansarem ol kwestens ia.
 - Wanem bae i happen sapos yumi lusum fores taem yumi ova havestem?
3. Ridim artikel long Infomesen Sheet blong Session 5 mo ansarem ol kwestens ia:
 - From wanem ol pipol i laekem mani?
 - Yu ting se royalty blong logging oli divaedem equally bitwin ol lanona? Explenem se lanona

long workshop ia yu stap tokabaot wan famili be ino wan man nomo.

- Wanem nao olgeta short-term ekonomik impakts?
 - Wanem nao olgeta long-term ekonomik impakts?
4. Ridim poem long Infomesen Sheet blong Session 5 mo diskasem ol kwestens ia:
 - Wanem nao poem ia i talem long yu?
 - Yu agri wetem toktok we poem i talem? From wanem?
 5. Plis ridim text blong Melanesian Conservasen Tras long Infomesen Sheet blong Session 5 mo diskasem ol kwestens ia:
 - Raetem wan lis blong ol difren wei mo fasen we yumi save mekem mani aot long fores.
 - Yumi save winim mani long ol wanem wei mo wanem fasen?
 - Hao nao yumi save winim mani we yumi no katem daon evri fores?

➡ Infomesen pepa blong Session 5: Ekonomik Impakt Blong Logging

Fores Emi Laef Blong Yumi

Fores emi wan sos nomo blong domestic nids blong ol Ni-Vanuatu. Fores emi provaedem faeawud, timba, ples blong wael laef, kakai mo medicine. Ino emia nomo, emi provaedem inkam blong kantri ia tru long export indastri mo domestic indastri. Ol indastri ia oli provaedem fulap mani long ol lanona mo long gavman evri yia tru long ol logging permits mo laesens. Dipatmen blong Forestry emi bin wok had blong mekem sua se ol indastri i harvestem fores long wan sastenabol fasen. Forestry Dipatment, i talem se yumi nid blong usum bush wetem fulap kea mo rispek blong sastenem yumi tedei i go kasem fiuja. 'Sapos yumi lusum natural fores blong yumi, i minim se i gat wan ril denja long laef blong yumi. Mo bae revenue blong gavman mo ol pipol i go daon'.

Talemaot Gudfala Saed – Fores o Mani?

Plante lanona oli saenem logging agrimen from oli bilif se bae i gat gudfala ekonomik saed blong hem. Oli wantem mani from helt, edukesen, relijen, infrastrakja developmen, stoa, rod, bridges, skuls, mo investment long fiuja.

Samtaem kiaman promis blong kampani, lanona i gridi, o komuniti i fail blong statem ol aktiviti we i save karem mani ikam insaed long komuniti i mekem se ol lanona oli wantem saenem ol bigfala logging agrimen. Fulap taem oli no wantem tingabaot sapos emia emi wan waes desisen mo wanem nao ol nogud saed blong hem.

Emia samfala ekonomik benefits we yumi save talem se i save kamaot long bigfala logging: (i) Inkrisim inkam blong wanwan haos (pem ol kakai long stoa, sevis, joij donesen, sapotem famili), (ii) Save givim wok; (iii) janis blong kasem trening; (iv) Developem ol rod; (v) Developem ol infrastrakja (skuls,

klinik), etc...Yet, i gat ol problem we oli konekt wetem 'benefits'. Olsem we yumi evriwan i save se royalty i neva divaedem equally bitwin ol lanona. Ating majoriti blong rural pipol i no benefit long wan bigfala inkris long famili inkam.

Emi normal blong luk se ol rod mo infrastrakja we logging kampani i provaedem emi no olsem we oli promisem. Eksampol, ol condisen blong rod i pua mo oli no save mentenem.

I gat ol shot tem ekonomik benefits long ol bigfala harvesting. Be long narafala saed, distribusen blong royalties ino fair, oli no developem ol skills blong ol wokman, mo kampani ino gat save blong mekem plan blong infrastrakja mo no save mentenem i mekem se ol ekonomik benefits oli general mo i stap smol taem nomo. Emia emi eksperiens blong fulap komuniti blong Vanuatu we oli bin

saenem ol bigfala logging agrimen. Fulap benefits oli kam long shot-tem nomo. Be long long-tem, ekonomik impakts hemi negatif.

Ol pipol we oli liv long vilij, oli gat ol bigfala janis blong fesem ol impakts blong wan ekonomi we ino gud long ol bigfala harvesting. Ating impoten wan nao emi taem yumi lusum ol risos we yumi nidim blong sapotem kastom fasen blong laef. Plante komuniti we oli givim raet long ol large-scale harvesting oli mas go bak long kastom fasen blong laef, taem logging emi finis. Sapos fores mo marine risos i damej, kwaliti blong laef afta long harvest emi go daon. Hemia hemi wan stret kos blong ekonomi. Sori blong talem se ol ekonomik benefits blong bigfala (large scale) logging aktiviti hemi stap smol taem nomo, mo i gat ol nogud ekonomik impakts we oli save stap long taem.

➤ Infomesen pepa blong Session 5: Ekonomik Impakt Blong Logging



Emia emi kam long Melanesian Conservasen Tras

Logging hemi wan popula aktiviti we yumi save mekem mani aot long fores. I gat plante fasen blong mekem mani long fores. Long samfala ples long Melanesia, pipol ikarem mani aot long fores tru long ol ek blong ol wael pidjin, karem spesel kakai (olsem wael yam,), mekem baskets mo mekem carvings blong salem, planem mo salem orchid plants o salem hani blong ol wael bees. Long ol narafala ples long wol, pipol i liv long fores mo karem mani from oli help blong protektem spesel plants mo animals, o karem ol plants we yu save usum blong mekem medicines (MCT: p. 89).

Wan Poem

*'Emi nomo taem nao
Yu katem daon lasfala tri,
Hukum las fish mo
Spolem las riva,
Bae yu
Rialaesem se yu no save kakai maní'.*



Session 6:

Komuniti Decision-Making

Long En Blong Session patisipen i save:

- Diskasem desisen -making long komuniti
- Tokabaot desisen-making blong logging
- Andastanem se ol pipol oli kat difren aedia (ideas) abaot logging
- Tokabaot mo Luksave impotens blong inkludem evriwan long decision-making process

Taem

60 minutes

Ol Samting We Yu Nidim

Braon pepa mo pens, sam jeas (dipen long number blong stakeholders) ol cads, post-it notes mo ol patisipens. Raetem nem blong ol stakeholders long ol cads.



Learning Circle Instraksens

1. Givimaot 5 post-it notes long wanwan patisipen. Askem olgeta blong raetem tingting blong olgeta long toktok ia “Desisen Making” o wanem nao toktok ia i minim long yu. Talemaot long olgeta se oli no nid blong raetem nem blong olgeta long post-it notes.
2. Talemaot long olgeta se bae i nogat presentesen be taem oli finis bae oli go stikim long pepa we i stap long wall.
3. Putum i go long wall wan braon pepa – hemia hemi blong ol patisipen oli kam putum ol ansa blong olgeta long hem.
4. Taem oli finis fasilitator i save ridim wanem we wanwan patisipen i raetem iko long evriwan. Mo enkarejem evriwan blong kam ridim ol notes long butcher paper ia (long wall) long lunch mo break.
5. Askem wanwan patisipen blong tingabaot samfala taem we oli bin mekem ol desisen long laef blong olgeta. eg. mekem desisen blong pem naef, o planem kava, etc...Givim samfala taem - 5 minutes blong olgeta i tingting. Talemaot long olgeta se wanem we oli tingabaot hemi blong olgeta nomo....wanwan patisipen ino save talemaot tingting blong hem.
6. Nao askem olgeta blong go long smol grup (3-4 pipol long wan grup). Askem olgeta blong tokabaot ol kwesten ia mo raetem ansa long braon pepa.
 - Wanem ol bigfala isius we komuniti i stap mekem desisen long hem?
 - Hu nao i save mekem desisen long wota blong komuniti?
 - Hu i gat raet blong stap long wan komuniti komiti?
 - Wanem kaen desisen yumi mekem long envaeronmen blong yumi?

7. Askem olgeta blong stap yet long grup mo diskasem ol kwestens ia:
 - Wanem samfala fasen we yumi usum blong mekem desisen long komuniti tede?
 - Hu nao i stap insaed long process ia blong mekem desisen?
 - Wanem yumi save mekem blong impruvem ol fasen ia?
 - Hao nao yumi save karem tugeta ol woman mo evriwan long decision-making process?
8. Ridim situesen ia daon mo folem ol steps ia daon blong mekem aktiviti ia. Tokabaot ol isiu ia long wan role-plei.

Wan Kampani hemi gat tingting blong katem fores we komuniti blong yu i lukaotem. Hemi posibol se komuniti i save benefit long sam samting mo tu i save gat ol nogud impakts long komuniti long narafala wei. Jif blong komuniti i singaotem wan miting blong tokbaot ol isiu ia.

Steps:

- a. Putum i go antap (long wall) wan pis butcher pepa.
- b. Askem ol patisipen blong talemaot ol stakeholders we oli save intres long statement ia. Nao explenem toktok ia stakeholders long ol patisipens. Askem evriwan blong faenemaot key stakeholders mo raetem nem blong olgeta long butcher pepa.
- c. Tokabaot ol intres blong ol stakeholders ia wetem ol patisipens. Hemia bae i helpem fasilitator blong luksave ol key stakeholders.
- d. Nao raetem nem blong ol key stakeholders ia long wanwan cad. Laenemap ol cad ia long floa/graon. Nao askem wanwan patisipen blong kamaot long jea blong olgeta mo kam stanap raon long ol cad ia.
- e. Askem wanwan patisipen blong stanap klosap long wan stakeholder. Talemaot long ol patisipen se taem wan i jusum wan cad, hem i ripresentem stakeholder, ia hemi mas toktok long intrest mo lukluk blong stakeholder ia.
- f. Raon Wan – wanwan patisipen mas toktok long experiens blong stakeholder ia. Diskasen i mas riflektem tingting blong stakeholders. Afta long toktok, muv i go long narafala cad.
- g. Raon Tu – naoia yu stap wetem wan niufala stakeholder, mekem sua blong toktok folem intres blong hem.
- h. Raon Tri - moa fulap raon – Gohed blong tokabaot mo presentem ol niu poen blong niufala stakeholder.
- i. Kontiniu long diskasen go kasem taem evri patisipen oli toktok. Olgeta we oli ripresentem ol stakeholder oli mas givim tingting blong olgeta.
 - Hao nao yu filim taem yu stap long posisen blong narafala?
 - Wanem ol gudfala samting we yu harem ol patisipen i talem?
- From wanem emi impoten blong lisen long tingting blong evriwan?
- Wanem nao i save kam risals blong harem ol tingting blong evriwan long wan process blong mekem desisen long komuniti?
- Wanem yumi nid blong jenisem blong i save karem tingting blong evriwan?



Session 7:

Ol Raets Blong Fiuja Jeneresen

Long En Blong Session patisipen i save:

- Andastanem raet blong ol fiuja jeneresen
- Andastanem ol samting we i save influensem decision-making long komuniti

Taem

60 minutes

Ol Samting We Yu Nidim

Braon pepa mo pens

Learning Circle Instruksens

1. Divaedem ol patisipen i go long smol grup blong 4. Mekem sua blong jenisem ol patisipen long wan grup.
2. Kivimaot Infomesen Sheet blong Session 7 long ol patisipen mo askem olketa blong ridim mo ansarem olketa kwestens ia:
 - Diskasem hao nao emia i afektem yu taem blong mekem desisen.
 - Hao emi afektem fasen we yumi usum ol natural risos?
3. Serem ol tingting long grup long stetmen ia ***'Ol samting we yumi bon wetem'***. Hemia hemi inkludem ol problems mo ol benefits we yumi bon wetem. Risal blong serem ol tingting ia bae yu putum i go long tu grup; wan wetem heading ia ***'Benefits'*** mo narawan emi ***'Problems'***. Hemi isi blong disaedem ol tingting ia long tufala grup ia.
4. Diskasen hemi mas lukluk plante long living blong yumi tedei mo sapos bae afektem laef blong ol fiuja jeneresen. Bakeken serem ol tingting mo faenemaot ol positif mo negatif impakts.
5. Wok long smol grup mo konsidarem wanem nids mo wanem raets blong fiuja jeneresen we i mas stap oltaem. Naoia i nid blong stat lukluk long

proposal we i stap long Infomesen Sheet blong Session 7. Hemi kamaot long wok blong wan ekonomist we i gat fulap intres long sastenabol developmen.

- Wanem nao hemi minim taem we emi tokabaot ol rij samting we man i mekem? Provaedem sam eksampol, (haus, ol stoa, bisnis, ol faktri, mani).
 - Wanem hemi minim taem emi tokabaot ol rij samting we emi natural? Provaedem sam eksampol, (mineral risos; klin ea mo wota; difren koleksen blong ol animol mo plant; gudfala graon blong garen; klin sanbij.)
 - Wanem i happen tedei we yu ting se bae i pas i go long nekis jeneresen mo ating bae oli no benefit long hem tumas?
 - Wanem nao ol pipol oli stap mekem tudei we yu ting se nekis jeneresen bai i gohed blong benefit long hem?
 - Yu ting se taem yumi tokabaot fiuja jeneresen, tingting ia i save jensim fasen mo tingting blong yumi long wanem yumi mekem mo wanem nao impakts blong hem? From wanem?
6. Ridim artikol we Baines i raetem long Infomesen Sheet blong Session 7. mo ansarem ol kwesten ia:
 - Wanem nao ol tingting blong hem long ol impakts blong logging long fiuja jeneresen?

➤ Infomesen pepa blong Session 7: Raets Blong Fiuja Jeneresen

7 Jeneresen

Wan American Indians igat wan fasin blong tingting we emi intres tumas taem hemi kam blong ol impoten desisen we i afektem komuniti mo graon blong olgeta. Taem oli mekem desisen, oli mas tingabaot ol consequences we bae i happen afta long desisen ia. Oli mas lukluk lo intres, helt, hapines blong ol famili blong olgeta we bae i stat tede go kasem olgeta we bae oli liv kasem 7 jeneresens.


Wan Proposal

‘Wan toktok emi talem se yumi mas mekem i fea long evri jeneresen i risivim semfala ‘rij’ (benefits) naturally mo emia we man i mekem, olsem we yumi tede yumi stap risivim. So next jeneresen emi gat raet blong risivim ol semfala “rij”. Sapos evri jeneresen i mekem olsem, bae ino gat wan single jeneresen bae i wari abaot fiuja. Wan jeneresen ‘I lukaotem gud olgeta we oli kam afta’.

Wan Atikol blong Baines

Mekem wan logging desisen hemi impoten! Sapos hemi wan waes desisen, bae hemi involvem evri lanona we oli gat fores i stap long graon blong olgeta. Sapos desisen i se wan eria nomo oli aloketem blong logging, emia i givim janis long ol fiuja jeneresen blong mekem desisen long hem folem ol problem we oli fesem. Logging i save

distroem ol narafala risos we wan famili i save dipen long hem long plante yia we bae ikam. Ol risos ia we ol bubu i bin dipen long hem mo oli bin lukaotem gud blong yumi usum bakeken. Katemdaon wan fores we grup blong ol pipol (ol bubu, yumi mo ol pikinini) i dipen long hem, i save kam wan gudfala developmen we oli experiensem. Be ol impakts blong hem long enviromen mo sosel consequences i spolem laef blong yumi’ (Baines, G.B.K., 1989. *Traditional Resource Management in the Melanesian South Pacific: A Development Dilemma*).



Session 8:

Status Blong Fores Long Vanuatu Tedei

Long En Blong Session patisipen i save:

- Diskasem ol long-term consequences/risals blong unsustenabol logging
- Diskasem ol long term consequences blong conversion blong fores i go long agrikalja
- Luksave impotens blong replanting

Taem

60 minutes

Ol Samting We Yu Nidim

Braon pepa mo pens

Learning Circle Instraksens

1. Ridim articles 'Ol Fores Onas i Blamem Kavman' abaot ret blong logging tede (Luk Infomesen Sheet blong Session 8). Diskasem long smol grup ol kwesten ia daon:
 - Wanem nao konsen blong ol lanona long saed blong risos?
 - Wanem responsibiliti nao oli ting se kavmen i sud tekem blong regulatem logging?
 - Blong mekem sua se ino kat ova-harvest blong logging i tekem ples. Hu nao yu ting se emi responsibiliti blong hem?

Fores Onas i Putum Blaim long Kavman (woksop patisipen)

'Gavman i save karem toktok mo blaim long fasen blong unsustenebol harvesting long kantri ia' wan lanona i talem.

Reaksen mo sapraes ia emi taem we logging industri i brekem rikod long ol nogud fasin (unsustenabol) blong harvesting, mo sapos responsibol gavman dipatmen i bin mekem gud wok blong hem, bae problem olsem ino save happen.

Ol risos ona oli talem se inkris long logging aktiviti ia emi backbone blong ekonomi blong

kantri ia. Olketa restriksen we i stap long forestri loa, yumi mas karemaot mo wok folem. Emia bae i helpem yumi blong promotem best praktis blong sustainable harvesting.

"Tudei ol effort we forestri dipatmen i stap traem blong karemaot, mo wanem bae i happen sapos fores blong yumi i continue blong ko daon long reit we i hae tumas emi olsem yumi stap crae ova long "spilt milk".

Wan local i talem se: "Sapos forestri dipatmen i mekem wok

blong hem blong monitorem mo promotem sustenabol harvesting long ol yia we i pas finis, bae yumi no save karem of efekt blong hem mo bae yumi no sapraes long harvesting ret blong tede we i hae bitim sastenabol ret.

Ol lanona oli talem se infomesen i sud kasem ol logging companies long fes ples mo gavman i sud monitorem operesen blong logging kampani ia blong mekem sua se oli comply wetem nasional sustenabol cut long ol natural fores blong yumi long evri yia.

Session 9:

From Wanem Yumi Raorao From Natural Risos?

Long En Blong Session ia patisipen i save:

- Raetem wan list blong ol raorao we I happen long komunit
- Luksave raorao we I lid iko lo violence or faet mo emia we ino gat violence
- Andastanem from wanem raorao i hapen bitwin ol pipol
- Diskasem hao nao raorao i save lid iko kasem violence o faet

Taem

60 minutes

Ol Samting We Yu Nidim

Braon pepa mo marker pens

Learning Circle Instraksens

1. Ridim olgeta introdaksen ia daon.

Fulap raorao i hapen from ol pipol i fail blong tokabaot ol difrenses blong olgeta tugeta. Fasin we ol pipol i lukluk wanwan long olgeta emi olsem we oli stap long difren wol mo emia emi dipen long fulap samting inkludim ol samting ia: (i) yia, (ii) wok, (iii) kalja, (iv) genda, (v) edukesen, (vi) Inkam, (vii) race (viii) laef experiens mo bilifs blong jioj.

Akseptem mo rispektem ol diferenses – olsem race, genda, kalja, religious, edukesen, mo ol narafala – i save help blong preventem raorao blong i develop. From olgeta samting ia nao i mekem se wanwan man/woman i luk samting i difren long ol narafala wan mo i save enkarejem yu raorao wetem ol narafala grup. Ol pipol i lukluk ol samting long wol ia wetem intres blong olgeta nomo.

2. Givim wan eksampol long taem we yu bin givim wan tingting we i difren long ol narafala wan.

Blong karem moa save mo ol narafala fasen blong lukluk wol, yumi wanwan i nid blong

- Karem fulap moa infomesen;
- Lisen openly mo traem putum yumi i go long “sus” blong narafala wan;
- Luksave se i gat narafala “wol” we yu nid blong faenemaot.

3. Go long grup blong tu, diskasem mo ripotem lokol mo intanasonal conflict o raorao wei hapen long Vanuatu.

Seperatem ol conflict ia igo long tufala grup ia:

- Long diskasen blong yufala; faenemaot sapos igat ol conflicts/raorao we ol pipol i faet o oli no faet?
- Emia we oli respond long wan fasen we oli no faet (non-violent)
- Emia we oli respond tru long faet (violence)
- From wanem nao conflicts i stap lid i go long faet (violence)?
- Hao nao yumi save solvem ol conflicts long wan fasin we ino kat faet (non-violent)?
- Wanem skills nao yumi nidim blong lanem we i save helpem yumi blong no faet?

Session 10:

Natural Risos mo Conflict

Long En Blong Session patisipen i save:

- Faenemaot ol conflicts we i save happen ova long natural risos
- Diskasem olketa impakts blong conflicts long komuniti
- Faenemaot olketa posibol fasen blong solvem gud wan conflict

Taem

60 minutes

Ol Samting We Yu Nidim

Braon pepa mo marker pens

Learning Circle Instraksens

1. Yumi save talem se problem blong logging long Vanuatu i stat wetem wanwan man mo gro igo kasem level we komuniti i tokabaot olgeta isiu blong graon. Hao nao yumi save solvem ol conflicts/ raorao ia?

Diskasem olgeta kwestens ia:

- Yu ting se conflicts i happen nomo taem yumi usum natural risos?
 - Long wanem wei/fasen ol pipol blong Vanuatu i argue ova long use, akses mo control blong natural risos?
 - Yu ting se yu save gud ol conflicts we i save kamaot long isiu blong natural risos?
 - Wanem nao ol konsens blong ol pipol?
 - Wanem nao posibol aotkam o risal blong raorao?
 - Wanem nao olgeta fasen we yumi stap usum tedei blong solvem ol raorao long vilij?
 - Wanem nao olgeta kastom fasen blong solvem land disputes?
 - Hu nao i save kam insaed blong solvem conflict mo raorao blong graon?
2. Askem patisipen blong klosem ae mo sidaon kwaet. Traem blong tingbaot se yu stap lisen long

wan storian blong tu membasa blong komuniti. Wan emi kam long ol komuniti we oli stap klosap long logging eria mo we oli fesem ol isiu blong envaeronmen. Mo narawan ikam long wan komuniti we oli liv 30 kms daon long riva. Olketa oli tokabaot ol isiu we i stap afektem olketa mo oli bilif se emi kam from logging.

- Wanem nao yu ting se oli bin talem? Hu nao ino bin toktok?
- Wanem nao olgeta fasin we yumi save usum blong solvem ol isiu ia?
- Hao nao bae yumi karem ol pipol we oli kat ol difren tingting mo nids tugeta?
- Hao nao bae yumi tekem aksens blong solvem raorao ia long wan gudfala fasin?
- Hao nao bae yumi buildem mo kipim gudfala rilesensip long vilej ia?
- Hao nao bae yumi wok tugeta blong mekem ol gudfala samting?

Raorao hemi no helti! Emi save distroem fulap samting. Mo emi bin wan positif force we i save jensen rilesensip bitwin ol pipol. Conflict emi normal – hemi fasin we ol pipol i handelem, i save mekem se i kriatem difrenses long famili mo komuniti rilesensips.

Session 11:

Kastom Tabu Mo Bi-Law

Long En Blong Session ia patisipen i save:

- Save wanem hemi kastom tabu mo bi-law
- Impotens blong kastom tabu mo bi-law blong lukaotem envaeromen
- Hu nao hemi enfosem kastom tabu mo bi-law
- Sam eksampol mo kes stadi blong ol kastom tabu mo bi-law

Taem

45 minits

Ol Samting We Yu Nidim

Braon pepa, marker pen, sam kes stadi blong kastom tabu mo envaeromental bi-law

Learning Circle Instraksens

Part 1 – Kastom Tabu

1. Divaedem ol patisipen iko long smol grup we ikat 4 o 5 pipol long hem.
2. Raetem ol bigfala kwesten ia long hem mo putum iko antap long wall.

Ol kwestens ia igat:

- a. Askem ol patisipen blong kivim sam eksampol blong kastom loa
 - b. Wanem emi kastom tabu long saed blong envaeromen?
 - c. From wanem i gat kastom tabu blong lukaotem envaeromen?
 - d. Hu i gat raet blong putum kastom tabu lo vilej blong lukaotem envaeromen?
 - e. Hu bae i enfosem kastom tabu ia?
3. Askem ol wawan patisipen blong raetem daon ol ansa i go long wan butcher pepa.
 4. Presentem ol ansa long everiwan afta we yu finis.

Part 2 – Bi-Law

5. Raetem ol kwesten ia iko long ol pis pepa o card mo distributem long wanwan grup.
 - a. Wanem emi wan envaeromental Bi-Law?
 - b. From wanem yumi gat ol envaeromental Bi-Law?
 - c. Hu i appruvum wan envaeromental Bi-Law?
 - d. Hu bae i enfosem ol wan envaeromental Bi-Law?
 - e. Wanem sam gudsaed mo badsaed blong wan envaeromental bi-law?
6. Askem wanwan grup blong diskasem ol kwesten ia mo raetem daon ol ansa iko long wan butcher pepa.

Diskussem sam kes stadi mo givim sam exampol blong ol envaeromental kastom tabu mo envaeromental bi-law lo Vanuatu.

Session 12:

Hu i Responsible Blong Lukaotemgud Fores?

Long En Blong Session patisipen i save:

- Luksave se fores mo envaeronmen emi responsibiliti blong evriwan
- Andastanem se ol risoses blong bush emi impoten long laef blong yumi

Taem

2 haoo

Ol Samting We Yu Nidim

Braon pepa, marker pen

Learning Circle Instraksens

1. Usum olgeta poen ia blong statem diskasen

Bifo independence long 1980, ol vilij blong yumi oli bin stap long han blong ol jif. Ol jif oli mekem mo usum kastom rul blong lukaotem envaeronmen. Long taem ia tu ol jifs oli tekem responsibiliti long envaeronmen. Ol jif oli gat plante kastom fasen we oli usum blong mekem sua se evriwan long komuniti i save usum ol risos blong mitim nids blong olgeta. Be oli mekem sua se ol risoses ia oli manajem long wan fasen we ol fiuja pikinini o yumi tedei i save benefit long hem tu.

2. Askem ol patisipen blong raetem daon ol ansa blong olgeta folem ol kwesten ia:

- Wanem nao olgeta samting we ol pipol oli bin stap usum blong lukaotem gud envaeronmen?

3. Divaedem butcher pepa i go long 4 pats olsem emia long tebol ia daon.

Tebol 1

Jif	Lanona	Jif Blong Narafala Vilej	Ol narafala Aelan

4. Naoia muvum diskasen blong i riflektem ol samting we i stap hapen tudei, usum ol poen ia daon.

Emi bin 27 yia finis we yumi kasem independens. Kastom fasen oli stap kontinu blong jenis. Be ol jifs mo ol vilej oli kat responsibility yet long envaeronmen, mo naoia oli serem wetem gavman mo ol provins. From wanem nao yu ting se ol jenis ia i bin happen? Yu save talemaot se ol diffren jenis ia hemi responsibiliti blong yu?

5. Askem ol patisipen blong diskasem poen ia mo raetem daon ansa blong olgeta igo long butcher pepa folem tebol ia.

Tebol 2

Jif	Lanona	Jif Blong Narafala Vilej	Provincial Gavman	Nasonal Gavman

6. Naoia evriwan blong lukluk bak long tufala tebol ia mo talemaot wanem nao i bin hapen long tebol 1 mo wanem i difren long tebol 2. Askem sapos oli luksave wanem nao i difren mo wanem nao i kosem jens ia? Nao ia askem long olgeta sapos emia emi tru long komuniti we yumi liv long hem?

Session 13:

Diffren Roles – Wan Komuniti Nurseri

Long En Blong Session ia patisipen i save:

- Luksave impotent roles blong ol difren pipol insaed long komuniti
- Save tokabaot role blong ol woman long fores konsevesen

Taem

45 minutes

Ol Samting We Yu Nidim

Ol patisipen

Learning Circle Instraksens

1. Talemaot long patisipen se emia emi wan role plei we bae i involvem evriwan.
2. Nao askem olgeta blong go long ol smol grup blong 5.
3. Talemaot long olgeta se bae oli aktem aot samfala wok mo difren roles long wan komuniti nurseri
4. Askem sapos evriwan i save wanem emi wan nurseri. Sapos samfala i no save toktok ia, i gud blong explenem toktok ia long olgeta.
5. Givim samfala eksampol long ol wok we difren person bae i mekem long komuniti nurseri ia. Eksampol ol woman, ol man, ol yangfala mo ol pikinini.
6. Talemaot long olgeta hamas taem oli nidim blong practisim role play ia mo mekem i klia long evri grup se bae wanwan grup i kam long fores mo presentem i go long evriwan.
7. Afta we evriwan i presentem ol play blong olgeta, askem olgeta kwesten ia long evriwan:
 - Long tingting blong yu, wanem nao wok blong ol woman long bus?



- Lukluk bak long fes kwesten, Yu ting se ol woman oli stap mekem wok blong olgeta long bush? Sapos yes, plis explenem o sapos no from wanem?
8. Diskasen ia bae i save givim wan klia pikja long wok blong ol woman long wanwan komuniti. Naoia, askem wanwan patisipen blong go bak long grup mo mekem wan role plei we bae i lukim wan wok blong ol man, woman, pikinini mo ol yangfala long fasen blong lukaotem gud bush blong yumi. Mo hao nao yu ting se yumi save inkluem ol woman long ol fiuja developmen aktiviti long komuniti blong yumi.

Session 14:

Ecotourism mo Konsevesen Long Komuniti

Long En Blong Session patisipen i save:

- Andastanem toktok ia kosevesen mo ecotourism mo impotens blong tufala
- Faenemaot hao yu i save involve long ecotourism mo konsevesen aktiviti
- Hu i responsible long konsevesen

Taem

45 minits

Ol Samting We Yu Nidim

Braon pepa, marker pen

Learning Circle Instraksens

Part 1 – Konsevesen

1. Divaedem ol patisipen iko long smol grup we ikat 4 o 5 pipol long hem.
2. Raetem ol kwesten ia long braon pepa mo putum igo antap long wall. Ol kwestens ia igat:
 - Wanem emi komuniti konsevesen?
 - From wanem yumi mas enkarejem komuniti konsevesen?
 - Hu nao i save patisipet long komuniti konsevesen?
 - Hu bae i lukaotem mo i responsibol long eria blong Konsevesen?
 - From wanem i no mas gat raorao mo dispute blong graon insaed long wan komuniti konsevesen eria?
 - Wanem nao ol finansol/economic benefit blong gat wan konsevesen eria?
 - Long wanem taem stret yu ting se yumi save stat blong mekem konsevesen?
3. Askem ol wawan grup blong raetem daon ol ansa blong ol kwesten ia long wan braon pepa mo presentem ol ansa long everiwan afta we wan grup i finis.



Part 2 – Ecotourism

4. Raetem ol kwesten ia iko long ol pis pepa o card mo distributem long wanwan grup.
 - Wanem emi ecotourism?
 - From wanem yumi enkarejem ecotourism?
 - Yu ting se wataem nao emi gud blong save involve long ecotourism? Wea nao oli luk ol woman mo ol youth oli plei wan impotent pat long aktiviti ia?
5. Askem wanwan grup blong diskasem ol kwesten ia mo raetem daon ol ansa igo long wan butcher pepa. Mekem i klia se ino gat rong o raet ansa...be yumi stap serem ol infomesen bitwin yumi nomo.

Session 15:

Wanem Bae Yumi Mekem Naoia?

Long En blong Session ia patisipen i save:

- Faenemaot visions blong yumi long fiuja.
- Faenemaot strategies o rul blong jenis.

Taem

60 minutes

Ol Samting We Yu Nidim

Braon pepa mo colour pens/pencils/paint

Learning Circle Instraksens


1. Emia emi wan aktiviti we wanwan patipisen i save visualaesem o imajinem wanem laef nao bae man/ woman ia bae igat long fiuja, long komuniti blong hem, long Vanuatu mo long wol.

Steps:

- a. Relaxem bodi blong yu afta yu klosem ae blong yu
- b. Imajinem wan journey i go long fiuja, i go long wol long yia 2050. Hamas yia nao bae yu gat mo wanem nao wol emi luk? Ino gat raet o rong ansa long aktiviti ia.
- c. Mekem wan not long wanem 'pikja' nao i kam long hed blong yu.
- d. Openem ae blong yu mo droem o pentem pikja ia long braon pepa, bifo yu toktok wetem wan man/ woman
- e. Naoia faenem wan fren o go long smol grup mo tokbaot pikja blong yu i go long fren blong yu
- f. Ol pikja ia, yu save arenjem long wan fasen? Eksampol, positif o negatif; personal, lokol o global o olsem we yu lukim.

Riflektem olgeta diskasen tru long ol kwesten ia:

- Wanem nao yu luk? Wanem nao ol possibilities?
- Wanem nao ol samting we i stap stopem yu?
- Wanem komuniti risoses nao yumi save usum blong muvum wanem i stap tudei i go long vision blong fiuja?
- Wanem impoten mo realistic aksens we yumi save tekem long posisen we yumi stanap long hem tudei?
- Hu nao i willing blong tekemaot aksens ia?
- Wanem olgeta next steps?





Take care of the earth and she will take care of you.

—Anonymous



Government
of Canada



iwda



LIVE & LEARN
Environmental Education